

述異記序



按梁史云昉字彥升舉兗州秀才
拜太學博士為齊竟陵王記室參
軍專主文翰洎梁武踐祚為給事
黃門侍郎又為吏部郎遷中書舍
人轉御史中丞秘書監出為新安
太守卒於官年四十八追贈太常
謚曰敬大梁天監二年昉遷中書

舍人家藏書三萬卷故多異聞採
於秘書撰新述異記上下兩卷皆
得所未聞將以資後來刀筆之士
好奇之流文詞怪麗之端抑亦博
物之意者也

臨安府太廟前經籍鋪尹家刊行

述異記卷上



梁記室參軍任

昉

撰



昔盤古氏之死也頭為四岳目為日月脂膏為江海
毛髮為草木秦漢間俗說盤古氏頭為東岳腹為中
岳左臂為南岳右臂為北岳足為西岳先儒說盤古
氏泣為江河氣為風聲為雷目瞳為電古說盤古氏
喜為晴怒為陰吳楚間說盤古氏夫妻陰陽之始也
今南海有盤古氏墓亘三百餘里俗云後人追葬盤
古之魂也桂林有盤古氏廟今人祝祀
南海中盤古國今人皆以盤古為姓昉按盤古氏天
地萬物之祖也然則生物始於盤古

南海小虞山中有鬼母能產天地鬼一產十鬼朝產之暮食之今蒼梧有鬼姑神是也虎頭龍足蟒目蛟眉蛟蟒地目連生今吳越間防風廟土木作其形龍首牛耳連眉一目

昔禹會塗山執玉帛者萬國防風氏後至禹誅之其長三丈其骨頭專車今南中民有姓防風氏即其後也皆長大越俗祭防風神奏防風古樂截竹長三尺吹之如嗥三人披髮而舞

軒轅之初立也有蚩尤氏兄弟七十二人銅頭鐵額食鐵石軒轅誅之於涿鹿之野蚩尤能作雲霧涿鹿今在冀州有蚩尤神俗云人身牛蹄四目六手今冀

州人掘地得髑髏如銅鐵者即蚩尤之骨也今有蚩尤齒長二寸堅不可碎秦漢間說蚩尤氏耳鬃如劍戟頭有角與軒轅鬪以角觝人人不能向今冀州有樂名蚩尤戲其民兩兩三三頭戴牛角而相觝漢造角觝戲蓋其遺製也

太原村落間祭蚩尤神不用牛頭今冀州有蚩尤川即涿鹿之野漢武時太原有蚩尤神晝見龜足蛇首多疫其俗遂為立祠

堯使鯀治洪水不勝其任遂誅鯀於羽山化為黃熊反如來入于羽泉今會稽祭禹廟不用熊白黃能即黃熊也陸居曰熊水居曰能昉按今江淮中有魚名熊

熊蛇之精至冬化為雉至春復為蛇今吳中不食雉毒故也

揚州有蛟市蛟人鬻珠玉而雜貨蛟布蛟人即泉先也

南海出蛟綃紗泉先潛織一名龍紗其價百餘金以為服入水不濡

南海有龍綃宮泉先織綃之處綃有白之如霜者

鬱林郡有珊瑚市海先中珊瑚樹碧色生海底一株十枝枝間無葉大者高五六尺至小者尺餘蛟人云海上有珊瑚宮漢元封二年鬱林郡獻瑞珊瑚光武時南海獻珊瑚婦人帝命植於殿前謂之女珊

瑚一旦柯葉甚茂至霸帝時樹死咸以為漢室將亡之徵也

凡珠有龍珠龍所吐者蛇珠蛇所吐者南海俗諺云蛇珠千枚不及玫瑰言蛇珠賤也大玫瑰也亦是越人諺

云種千畝木奴不如一龍珠

越俗以珠為上寶生女謂之珠娘生男謂之珠兒吳越間俗說明珠一斛貴如玉者合浦有珠市

昔炎帝溺女死東海中化為精衛其名自呼每銜西山木石填東海偶海燕而生子生雌狀如精衛生雄如海燕今東海精衛誓水處曾溺於此川誓不飲其水一名鳥誓一名冤禽又名志鳥俗呼帝雀女

東海島龍川穆天子養八駿處也島中有草名龍芻
馬食之一日千里古語云一株龍芻化為龍駒

陶唐之世越常國獻千歲神龜方三尺餘背上有文
科斗書記開闢已來帝命錄之謂之龜歷伏滔述帝
功德銘曰胡書龜歷之文

夏桀宮中有女子化為龍不可近俄而復為婦人甚
麗而食人桀命為蛟妾告桀吉凶

桀時泰山山走石泣先儒說桀之將亡泰山三日泣
今泰山山石遠望之若人泣蓋是也周武謂周公曰
桀為不道走山泣石

堯為仁君一日十瑞宮中芻化為禾鳳凰止於庭神
龍見於宮沼歷草生堦宮禽五色鳥化白神木生蓮
萋蒲生廚景星耀於天甘露降於地是為十瑞

東海畔有孤竹焉斬而復生中有管周武王時孤竹
之國獻瑞筍一株

空桑生大野山中為琴瑟之最者空桑也

周成王元年貝多國人獻舞雀周公命返之南海中
有軒轅丘鸞自歌鳳自舞古云天帝樂也崆峒山中
有堯碑禹碣皆籀文焉伏滔述帝功德銘曰堯碑禹
碣歷古不昧

會稽山有虞舜巡狩臺臺下有望陵祠帝舜南巡葬
於九疑民思之立祠曰望陵祠

帝舜都鄒門古宮存焉宮前有堯臺舜館銘記古文
莫有識者

湘水去岸三十里許有相思宮望帝臺昔舜南巡而
葬於蒼梧之野堯之二女娥皇女英追之不及相與
協哭淚下沾竹竹文上為之班班然

昔戰國時魏國苦秦之難有以民從征戍秦久不返
妻思而卒既葬塚上生木枝葉皆向夫所在而傾因
謂之相思木今秦趙間有相思草狀如石竹而節節
相續一名斷腸草又名愁婦草亦名霜草人呼寮莎
蓋相思之流也

海南有懶婦魚俗云昔楊氏家婦為姑所溺而死化
為魚焉其脂膏可燃燭燈以之照鳴琴博奕則爛然
有光及照紡績則不復明焉

水虺五百年化為蛟蛟千年化為龍龍五百年為角
龍千年為應龍

沮渙二水波文皆若五色彼人多文章故一名績水
灌淝之間離別亭古送別處漢沔會流處岸上有石
銘云下至水府三十一里皆傳云李斯刻此石

鹿千年化為蒼又五百年化為白又五百年化為玄
漢成帝時山中人得玄鹿烹而視之骨皆黑化仙者
說玄鹿為脯食之壽二千歲

餘干縣有白鹿土人皆傳千年矣晉成帝遣捕得銅

牌在角後書云漢元鼎二年臨江所獻白鹿
淮水中黃雀至秋化為蛤春復為黃雀雀五百年化
為蛤梓樹之精化為青羊生百年而紅五百年而黃
又五百年而色蒼又五百年而色白
龜千年生毛龜壽五千年謂之神龜萬年曰靈龜
海魚千歲為劍魚一名琵琶魚形如琵琶而善鳴因
以名焉

漢中山有虎生角道家云虎千年則牙蛻而角生
漢宣城郡守封邵亘化為虎食人郡民呼之曰封使
君因去不復來故時語曰無作封使君生來治民死
食民夫人無德而壽則為虎虎不食人人化虎則食
人蓋恥其類而惡之
獍之為獸狀如虎豹而小始生還食其母故曰梟獍
濟陽山麻姑登仙處俗說山上千年金雞鳴玉犬吠
闔閭夫人墓中周迴八里別館洞房迤邐相屬漆燈
照爛如日月焉尤異者金蠶玉燕各千餘雙
吳王夫差築姑蘇之臺三年乃成周旋詰屈橫亘五
里崇飾土木殫耗人力宮妓數千人上別立春宵宮
為長夜之飲造千石酒鍾夫差作天池池中造青龍
舟舟中盛陳妓樂日與西施為水嬉吳王於宮中作
海靈館館娃閣銅溝玉檻宮之楹檻珠玉飾之
吳既滅越棲勾踐於會稽之上地方千里勾踐得范

蠡之謀乃示民以耕桑延四方之士作臺于外而館
賢士今會稽山有越王臺今交州麻林一名紉林勾
踐種麻將以弦弓文州糠頭山勾踐貯米於其上春
積糠為山今會稽之上有越王鑄劍洲箭鏃洲往往
有得古箭鏃蓋古制也

廣州東界有大夫文種之墓墓下有石為華表柱石
鶴一隻種即越王勾踐之謀臣也

洞庭湖中有釣洲昔范蠡乘扁舟至此遇風止釣于
洲上刻石記焉有一陂陂中有范蠡魚昔范蠡釣得
大魚烹食之小者放於陂中陂邊有范蠡石牀石硯
鈎鏘范蠡宅在湖中多桑紉英果有海杏大如拳苦

菜甘柚林石壁上鑿兵書十篇菰葑川皆范蠡手植
定陶有范蠡千斛魚陂木桃園酸棗林

梧桐宮在句容縣傳云吳別館有秋梧桐林成馬梧子
可食古樂府云梧宮秋吳王愁是也

闔閭墓中石銘云吳王之夜室也嗚呼乎吾君王棄
吾之邦遷于重崗維崗之陽吾王之邦

今宜都有吳王射亭木棠苑木棠果名似梨而甜宜
都七里溪吳王射堂堂之柱礎皆如伏龜袁宏宮賦
曰海龜之礎是也

蒼頡墓在北海呼為藏書臺周人周末發冢得方玉
石上刻文八十字當時莫識遂藏之書府至秦時李

斯識八字云上天作命皇辟迭王至叔孫通識十二
字

瀨鄉石堂有老子篆書道德經五千字蔡邕於其旁
以隸書證之

番禺有酸柿甜梅李尤果賦生物賦偏梅甜柿酸漢
章帝三年子母筍生白虎殿前時謂為孝竹羣臣獻
孝竹頌

越多橘柚園越人歲多橘稅謂橙橘戶吳書闕尚表
請除臣之橘籍是也

越中有王氏之橘園胡氏之梅山賀氏之竹丘吳中
有陸家白蓮顧家班竹趙有韓氏之酸棗

中山有楸戶掌楸木者楸子為竹器漢書貨殖志千
年楸

邯鄲有故宮基存焉中有趙王之果園梅李至冬而
花春得而食

鄴中銅駝鄉魏武帝陵下銅駝石犬各二古詩云石
犬不可吠銅駝徒爾為

一說香水在并州其水香潔浴之去病吳故宮亦有
香水溪俗云西施浴處人呼為脂粉塘吳王宮人濯
粧于此溪上源至今馨香古詩云安得香水泉濯郎
衣上塵俗說魏武帝陵中亦有泉謂之香水

饒州俗傳軒轅氏鑄鏡於湖邊今有軒轅磨鏡石石

上常潔不生蔓草

桂林東南邊海有裸川桓譚新論云呈衣冠於裸川
海上有裸人鄉

丹陽大姑陵下有石麟二枚不知年代傳曰秦漢
間公卿墓則以石麒麟鎮之

盧氏縣有盧君古塚塚旁柏二株枝條蔭茂二百餘
步樹文隱起皆如龜甲根勁如銅石

盧府君墓在館陶縣南二十里不知何代銘曰盧府
君歸真之室

廬陵郡有董氏之宅前有董家祠昔有董氏語其鄉
人曰吾當盡室作神及死家人老幼皆卒鄉人往往

見之稱吾於地下作廬陵侯鄉人因為立祠能致風

雨

安定西隴道其谷中有彈箏之聲行人過聞之謂之
彈箏谷

粉水出房陵永清谷取其水以漬粉即鮮潔有異於
常謂之粉水

漢水西山有九井井中常出五色煙高數丈傳云昔
有人縫入得斛數空青

西海外有鵠國人長七寸日行千里百獸不犯惟畏
海鵠鵠見必吞之在鵠腹中不死鵠一舉亦千里

吐綬鳥其身大如鶴五色出巴東山中毛色可愛若

天晴淑景即吐綬一尺長須臾還吞之陰滯即不吐
陽泉在天餘山北清流數十步所涵草木皆化為石
精明堅勁其水所經之處物皆漬為石
却塵犀海獸也然其角辟塵致之於座塵埃不入
羊山上有燃石其色黃而文理疏以水沃之便如煎
沸其上可炊烹稍冷即復以水沃之
猊獠獸中最大者龍頭馬尾虎爪長四百尺善走以
人為食遇有道君即隱藏無道君即出食人
辟寒香丹丹國所出漢武時入貢每至大寒於室焚
之暖氣翕然自外而入人皆減衣
迷穀出招搖山亦名鵲山其樹如穀又如楮其花四

照名曰迷穀如佩之令不人迷

南康樛都縣西泂江有石室名夢口穴嘗有船人遇
一人通身黃衣檐兩籠黃瓜求寄載過至岸下此人
唾盤上徑下崖直入石穴中船上初甚忿之見其人
入石始知異視盤上唾悉是金矣

噲參養母至孝曾有玄鶴為戎人所射窮而歸參參
收養療治瘡愈放之後鶴夜到門外參秉燭視鶴雌
雄雙至各銜明月珠以置參家

炎洲在南海中上有風生獸似豹青色大如狸網取
之積薪數車燒之可燃鐵鎚鍛頭數十下乃死以口
向風須臾便活以石上菖蒲塞鼻即真死取其腦和

菊花服之可壽五百歲

南方有灾火山四月生火十二月火滅火滅之後草木皆生枝條至火生草木葉落如中國寒時也取此木以為薪燃之不燼以其皮績之為火浣布

蘭陵山有井異鳥巢其中金翅而身黑此鳥見即大水井不可窺窺者盈歲輒死

玉門西南有一國國中有山石磻坳林千枚名為霹靂磻從春雷而磻滅至秋磻盡雷收復生年年如此宣城蓋山有舒姑泉俗傳有舒氏女與父析薪女生泉處忽牽挽不動父遽告家及再至其地惟見清泉湛然其母曰女好音樂乃作弦歌泉乃涌流

搗衣山一名靈山在瑯琊郡山南絕險岩有方石昔有神女於此擣衣其石明瑩謂之玉女擣練碓

泮鄉西津有玉女岡天當雨輒先涌五色氣于石間俗謂玉女披衣

嶸州去玉門三千里地寒多雪着木石之上皆融而甘可以為菓

八方之荒有石鼓其徑千里撞之其音即成雷也天之申威於此

秦始皇作石橋於海上欲過海觀日出處有神人驅石去不速神人鞭之皆流血今石橋其色猶赤

員嶠山名還丘東有雲石廣五百里有蚕長七寸黑

色有麟角以霜雪覆之然後作繭長一尺其色五采
織為文錦入水不濡

園客者濟陰人貌美色人多欲妻之客終不娶常種
五色香草積十餘年服食其實忽有五色蛾集香草
上客薦之以布生華蚕焉至蚕時有一女自來助養
蚕以香草食之得繭一百二十枚繭大如甕每一繭
繅六七日絲方盡繅訖此女與客俱神仙去

并州妬女泉婦人不得艷粧綵服至其地必興雲雨
一名是介推妹

齊桓公北征孤竹見人長尺具衣冠左袂而走於馬
前管仲曰此山之神也名曰俞兒霸王去聲之君興則

見也

和州歷陽淪為湖昔有書生遇一老姥姥待之厚生
謂姥曰此縣門石龜眼血出此地當陷為湖姥後數
往視之門吏問姥姥具答之吏以硃點龜眼姥見遂
走上北山顧城遂陷焉今湖中有明府魚奴魚婢魚
信安郡石室山晉時王質伐木至見童子數人棊而
歌質因聽之童子以一物與質如棗核質含之不覺
饑俄頃童子謂曰何不去質起視斧柯爛盡既歸無
復時人

螺亭在南康郡昔有一女採螺為業曾宿此亭夜聞
空中風雨聲乃見眾螺張口而至便亂噉其肉明日

惟有骨存焉故號此亭為螺亭

北方有七尺之棗南方有三尺之梨凡人不得見或見而食之即為地仙

荀瓌字叔偉潛棲卽粧嘗東遊憇江夏黃鶴樓上望西南有物飄然降自霄漢俄頃已至乃駕鶴之賓也鶴止戶側仙者就席羽衣虹裳賓主歡對已而辭去跨鶴騰空而滅

晉安郡有一書生謝端為性介潔不染聲色嘗於海岸觀濤得一大螺大如一石米斛割之中有美女曰予天漢中白水素女天帝矜卿純正令為作君婦端以為妖呵責遣之女歎息升雲而去

東陽郡永康縣吳時有人入山逢大龜擔之未至家遇夜纜舟於岸見老桑呼龜曰元緒汝當死矣龜呼桑樹曰子明無苦也雖然盡南山之樵不能潰我對曰諸葛恪明敏禍必及於子明日其人將龜獻吳王命煮之三日三夜不煮死遂問諸葛恪恪曰此龜有精須得多年老桑為薪煮之立爛遂命老桑斫之為薪既燃得爛

漢武帝幸甘泉長平阪道中有虫赤如肝頭目口齒悉具人莫知也時東方朔曰此古秦獄地也積憂所致上使按圖果秦獄地朔曰夫積憂者得酒而解乃取出置酒中立消

洞庭山有宮五門東通林屋西達蛾眉南接羅浮北連岱岳東有石樓樓下兩石扣之清越所謂神鉦昔有青童秉燭颺飛輪之車至此其跡存焉上有天帝壇山山有金牛穴吳孫權時令人掘金金化為牛走上山其跡存焉故號為金牛穴
范文本日南奴也為奴時牧羊於澗中得兩鯉魚欲私食之郎知詰之文詐云將礪石還非魚也郎至魚所果見兩石文異之石有鐵文因入山中就冶作兩刀因舉刀向鄣鄣即蕃中山地名也呪曰鯉魚變化治成刀斫石鄣破者是有神靈文當治此國遂斫破之眾遂推為君

宋武帝微時伐荻於新州見一大蛇長數丈遂射之傷明日復往觀之聞杵臼聲覘見數青衣童子搗藥問其故答曰我王為劉寄奴所射今合藥傳之帝曰何神也童子不答帝叱之皆散收得藥人因名此草為劉寄奴

西域有鼠國大者如犬中者如兔小者如常鼠頭悉白商賈有經過其國若不祈祀則嚙人衣裳
周成王時東夷送六角牛

磅磳山去扶桑五萬里日所不及其地甚寒有桃樹千圍萬年一實一說日本國有金桃其實重一斤
吳王闔閭葬於吳縣三月有白虎居其上號曰虎丘

晉太康中會稽縣螿及羊皆化為鼠螿始變者有毛而無肉大食新稻

周穆王時天下連雨三月穆王乃吹笛其雨遂止漢武帝時西方日支國有獻活人草三莖有人死者將草覆面即活之矣

封微山中有怒毛獸若不嗔毛短三寸若嗔毛長三尺

南金山有師子禽其毛黃赤而光鮮耳小若鳴時地動石裂也

崑崙山有玉桃光明洞澈而堅瑩須以玉井泉洗之便軟可食

比方荒外有石湖方十里中有橫公魚夜即化為人刺之不入煮之不死若以烏梅二七箇煮之即熟可治邪病

東海郡尉于台有杏一株花雜五色六出號云仙人杏

晉時晉陵薛願家有虹飲其釜中水須臾而竭願因以酒祝而益之虹復飲盡吐金滿釜而去願家遂至大富

顧渚山有報春鳥春至即鳴秋分亦鳴似鷓鴣之類也

龍肝瓜長一尺花紅素生於冰谷所謂冰谷素葉之

瓜

越俗說會稽山夏禹廟中有梅梁忽一春而生枝葉漢成帝常與趙飛燕游太液池以沙棠木為舟其木出崑崙山人食其實入水不溺詩曰安得沙棠木刻以為舟船

巴東有真香茗其花白色如薔薇煎服令人不眠能誦無忘

伺潮雞潮水上則鳴孫綽望海賦曰石雞清響而應潮是也

聚窟州有返魂香樹伐其根心於玉釜中煮取汁又熬之令可丸名曰驚精香或名震靈丸或名反生香

或名卻死香死尸在地聞氣即活

岑華山在西海之西有蔓竹為簫管吹之若羣鳳之鳴

魏興錫義山多生微蘅草有風不偃無風獨搖

黃金山有楠樹一年東邊榮西邊枯後年西邊榮東邊枯年年如此張華云交讓樹也

石勒嘗備於臨水為遊軍所囚會有羣鹿傍道軍人競逐之勒乃獲免俄而又見一老父謂勒曰向來羣鹿者我也君應為列國主故相救耳

大食王國在西海中有大方石石上多樹幹赤葉青枝上總生小兒長六七寸見人皆笑動其手足頭著

樹枝使摘一枝小兒便死
獬豸者一角之羊也性知人有罪皋陶治獄其罪疑者令羊觸之

取鳥之未生毛者以丹和牛肉使吞至長羽毛皆赤殺之陰乾杵服壽五百歲

鄧通以擢船為黃頭郎曰土勝水其色黃故刺船郎皆著黃帽

漢元和元年大雨有青龍一墮於宮中帝命烹之賜羣臣龍羹各一杯故李尤七命曰味兼龍羹七命即文章名也

紫消山有石樓樹吳太皇元年郡吏伍曜於海際得之枝莖紫色有光南越謂之石連理也

南海有明珠即鯨魚目瞳鯨死而目皆無精夜可以鑒謂之夜光

千年木精為青牛

猿五百歲化為獾獾千年化為老人

鵠壽三千歲

鷲子千年生胡髯

虎魚老者為蛟

江中魚化為蝗而食五穀者百歲為鼠蛟羊似羊而無角啖之毒

古人說羊一名胡髯郎又名青鳥

周穆王之犬日走千里食虎豹

闔閭構水精宮尤極珍怪皆出自水府

瀨鄉老子祠有紫石榴紅縹李一李二色

勾漏縣有白橘青柑縹杏

南中生子母竹今之慈竹也

漢章帝元年上虞縣獻二蒂瓜一實二蒂及玉色橘

趙王故城俗呼為麋鹿城

梁孝王築平臺臺至今存有蒹葭洲鳧藻洲梳洗潭

中有望秦山商人望鄉之處

貝宮夫人廟在太一山下云懷元年夫人也廟即其

基也

當陽南有龍川鳳川云漢武帝時八龍五鳳常見於

此亦呼為五鳳州

魏文帝甄后陵在鄴中臨漳東北至今有甄后神

躬紂時太龜生毛而兔生角是兵甲將興之兆

述異記卷上

述異記卷下

梁記室參軍任昉撰

周幽王時牛化為虎羊化狼洛南有避狼城云幽為王時羣羊為狼食人故築城避之今洛中有狼村是也

關中有金魚神云周平二年十旬不雨遣祭天神俄而生涌泉金魚躍出而雨降

楚莊王時宮人一旦而化為野蛾飛去

秦始皇帝至東海海神捧珠獻於帝前今海畔有秦皇受珠臺

東海上有蒲臺秦始皇至此臺下縈蒲繫馬蒲至今

縈紆

始皇二十六年童謠云阿房阿房亡始皇

古說雍州雨魚長八尺許

先儒說夏禹時天雨金三日古詩云安得天雨金使金賤如土是也

周成王時咸陽雨金今咸陽有雨金原

王莽時未央宮中雨五銖錢既而至地悉為龜兒

漢世翁仲孺家人貧力作居渭川一旦天雨金十斛於其家

漢惠帝二年宮中雨黃金黑錫

呂后三年秦中大雨粟

漢宣帝時江淮饑饉人相食雨穀三日秦魏地奏亡穀二十頃

漢武帝時廣陽縣雨麥

河間有雨鉛城漢世天雨鉛錫於此

周時咸陽雨錢終日而絕

秦二世元年宮中雨金既而頃刻皆化為石

漢成帝末年宮中雨一蒼鹿殺而食之其味甚美

大禹時天雨稻古詩云安天雨稻飼我天下民得

漢世潁川民家雨金銖錢

魏武帝末年鄴中雨五色石

吳桓王時金陵雨五穀於貧民家富者則不雨矣

魏時河間王子元家雨中有小兒八九枚墮於庭前長六七寸許自言家在河東南為風所飄而至於君庭與之言甚有所知如史傳所述

魏世河內冬雨棗

者舊說周秦間河南雨酸棗遂生野棗今酸棗縣是也

魏文帝安陽殿前天降朱李八枚啖一枚數日不食今李種有安陽李大而甘者即其種也

漢末陽氏家園中產神榛三株

武陵源在吳中山無他木盡生桃李俗呼為桃李源源上有石洞洞中有乳水世傳秦末喪亂吳中人於

此避難食桃李實者皆得仙

杜陵有金李李大者謂之夏李尤小者呼為鼠李桃之大者為木桃詩云投我以木桃是也

房陵定山有朱仲李園三十六所潘岳間居賦云防陵朱仲之李李尤果賦云三十六園朱李是也中山有縹李大如拳者呼仙李李尤果賦曰如拳之李陸士衡果賦曰中山之縹李又云仙李縹而神李紅

豫樟之為木生七年而後與眾木有異

漢武帝寶鼎二年立豫樟宮於昆明池中作豫樟水殿

袁紹在冀州時滿市黃金而無斗粟餓者相食人為

之語曰虎豹之口不如饑人劉備在荊州時粟與金同價

永嘉之亂洛中饑荒懷帝遣人觀市珠玉金銀闔委市中而無粟麥袁宏表云田畝由是丘墟都市化為珠玉是也

漢末大饑江淮間童謠云太岳如市人死如林持金易粟貴於黃金

洛中童謠云雖有千黃金無如我斗粟斗粟自可能千金何所直

耆舊說桓靈之世汝潁間桑林為蒿莠桃李不食花而復落落而復花而官倉有朽粟

晉永嘉中梁州雨七日麥化為飛蛾

晉末荊州久雨粟化為蠱虫害民春秋云穀之飛為蠱是也中郎王義興表奏曰臣聞堯生神木而晉有蠱粟陛下自以聖德何如帝有慙色

宋高祖之初年當晉饑饉之後即位以來江表二千餘里野粟生焉

古說淮南諸山石生穀袁安云石穀藥名穗之尤小者

漢世古諺曰雖有神藥不如少年雖有珠玉不如金錢

太原神金岡中有神農嘗藥之鼎存焉

成陽山中有神農辨藥處一名神農原藥草山山上
紫陽觀世傳神農於此辨百藥中有千年龍腦
冀州鵠山傳龍千年則於山中蛻骨今有龍岡岡中
出龍腦是也

今藥中有禹餘糧者世傳昔禹治水棄其所餘糧於
江中生為藥也

仙藥紫鳳腦千年髑髏是也

龜甲香即桂香之善者

紫朮香一名紅蘭香一名金桂香亦名麝香草出蒼
梧桂林上郡界今吳中有麝香草似紅蘭而甚芳香
南海山出千步香佩之香聞於千步也今海嶼有千

步草是其種也葉是杜若而紅碧間雜貢籍曰南郡
貢千步香

日南有香市商人交易諸香處

漢雍仲子進南海香物拜為涪陽尉時為之香尉

日南有千畝林名香出其中

香州在朱崖郡洲中出諸異香往往不知名焉千年
松香聞於十里亦謂之十里香

杏園洲在南海洲中多杏海上人云仙人種杏處漢
時嘗有人舟行遇風泊此洲五六日食杏故免死云
洲中別有冬杏

木蘭川在潯陽江中多木蘭樹昔吳王閻閻植木蘭

於此用構宮殿也七里洲中有魯班刻木蘭為舟舟
至今在洲中詩云木蘭舟出于此

天姥山南峯昔魯班刻木為鶴一飛七百里後放於
北山西峰上漢武帝使人往取之遂飛上南峰往往
天將雨則翼翅動搖若將飛奮

魯班刻石為禹九州圖今在洛城石室山

東北巖海畔有大石龜俗云魯班所作夏則入海冬
復止於山上陸機詩云石龜尚懷海我寧忘故鄉

上虞縣有石駝步水際謂之步

瓜步在吳中吳人賣瓜於江畔用以名焉

吳江中又有魚步龜步湘中有靈妃步昉按吳楚間

謂浦為步語之訛耳

公主山在華山中漢末王莽秉政南陽公主避亂奔
入此峯學道後得升仙至今嶺上有一雙朱履傳云
公主既於山中得道駙馬王咸追之不及故留二履
以示之潘安仁有公主峰記

晉永嘉亂既已至江諸公主不得隨去安陽公主平
城公主奔入兩河界悉為民家妻常怏怏不悅有故
鄉之思村民感之共築一臺以居之謂之公主望鄉
之館至今巋然王朗懷舊賦云將軍出塞之臺公主
望鄉之館漢成帝遣將軍王漬戍邊及帝崩王莽篡
逆潰與莽有隙遂留不敢歸因逃入胡中士卒相率

築臺為望鄉之處

曲阜縣南十里有孔丘墓秋臺曲阜古城有顏回墓墓上有石楠樹二株可三四十圍士人云顏回手植晉末群盜蜂起義陽公主自洛中出奔至洛南士卒二千餘人留守不去以衛京都劉曜攻破之主有殊色曜將逼之主手及曜不中遂自及曜奇其正節遣葬之封義陽公主隣民憐之為立廟今義陽神是也符堅既為姚萇所殺於新平佛寺中後寺主摩訶蘭常夢堅曰可為吾作宮既而寺左右民家死疫相繼巫者常見堅怒曰不吾宮將盡殺新平民因共改寺為廟遂無復災疾每年正月二日民競祀以太牢新平寺今符冢神也

今烏江長亭亭下有駐馬塘即當時烏江亭長艤舟待項王處

今陰陵故城九曲澤澤中有項王村即項籍迷失路處項王失路於澤中周回九曲後人因以為澤名燕昭王為郭隗築臺今在幽州燕王故城中土人呼為賢士臺亦謂之招賢臺

漢武帝於湖中牧馬處至今野草皆有嚼啮之狀湖中呼為馬澤澤中有武帝彈碁方石石上勒銘存焉歲蕤草一名麗草又呼為女草江浙中呼娃草美女曰娃故以為名

懸腸草一名思子蔓南中呼為離別草

苔草謂之澤葵又名重錢亦呼為宣蘇南人呼為姑草

萱草一名紫萱又呼為忘憂草吳中書生呼為療愁花嵇中散養生論云萱草忘憂

桂林有睡草見之則令人睡一名醉草亦呼為懶婦箴又出海南地記

楚中有宮人草狀如金盞而甚氤氳花色紅翠俗說楚靈王時宮人數千皆多愁曠有囚死於宮中者葬之後墓上悉生此花

舜草今之孝草也

蓆蓐草一名塞路生北方胡地古詩云千里蓆蓐草

紅蘭花一名大草

莢葵本胡中葵似葵而大者

寡草特生而不叢

洛陽有芝茵園漢官儀云染園出芝茵供染御服是其處也

紅綬花蔓生如綬有文采因名焉

甘泉宮有木園武帝時園也今俗呼為仙草園出漢魏宮志

蔓園在定陵漢官儀曰蔓園供染綠紋綬小藍曰蔓

稷蔓音

芙蓉園在洛陽漢家置之

長沙定王故宮有蓼園真定王故園也

張騫首蓂園今在洛中首蓂本胡中菜也張騫始於西戎得之

衛有淇園出竹在淇水之上詩云瞻彼淇澳綠竹猗猗是也

梧桐園在吳宮本吳王夫差舊園也一名鳴琴川

南中有楓子鬼楓本之老者為人形亦呼為靈楓焉後漢李子長為政欲知囚情以梧桐木為之像囚形穿地為坎卧木囚於其中祝之罪正者不動冤者木囚動出時以為精誠應子長時為大理卿

漢武宴於未央宮忽聞人語云老臣負自訴不見其形良久見梁上一老翁長八九寸面皺鬚白拄杖僂步至前帝問曰叟何姓名所訴者何翁緣柱放杖叩頭不言因仰視屋俯視帝脚忽不見帝駭懼問東方朔朔曰其名為藻兼水木之精也陛下頃來頻興宮室斬伐其居故來訴耳仰頭看屋而後視陛下脚者願陛下宮室足於此不欲更造帝乃息役後帝幸瓠子河聞水底有絃歌之聲置肴饌芬芳於帝前前梁上翁及數年少絳衣素帶佩纓皆長八寸一人最長長尺餘凌波而出衣不沾濕或挾樂器帝問之曰向所聞樂是公等奏耶對曰臣前昧死歸訴蒙陛下息

斤斧得全其居故相慶耳遂奏樂獻帝洞穴珠一枚
遂隱不見帝問方朔何謂洞穴珠朔曰河底有一穴
深數百丈中有赤蚌蚌生此珠徑寸明耀絕世矣帝
遂寶愛此珠置於內庫

燕昭王種長春樹葉如蓮花樹身似桂樹花隨四時
之色春生碧花春盡則落夏生紅花夏末則凋秋生
白花秋殘則萎冬生紫花遇雪則謝故號為長春樹
澄水泉在滄州九視山山下出泉濶百餘步亦名流
水渠雖泛金石終不沉故州人欲渡此泉以瓦鐵為
船舫
地生毛京房以為人勞之應北齊武成河清年中徐

州及長安地生毛長七尺時北築長城內築三臺人
苦勞役之應也

神泉出高密瑯琊郡人或禱祈求之則飛泉湧出清
冷而味甘人或污之則便竭

鹽田在河東郡有一大澤澤中產鹽引水沃之則自
成號曰鹽田取之無盡不沃則盡也又張掖有鹽池
自然生鹽鹽多少隨月增減

甜溪水其味如蜜東方朔得以獻武帝帝乃投於陰
井中井水遂甜而寒洗浴則肌理柔滑

日林國有神藥數千種其西南有石鏡方數百里光
明瑩徹可鑒五臟六腑亦名仙人鏡國中人有疾

輒照其形遂知病起何藏府即采神藥餌之無不愈
其國人壽三千歲亦有長生者

列禦寇鄭人御風而行常以立春日歸乎八荒立秋
日遊于風穴是風至即草木皆生去則草木皆落謂
之離合風

秦繆公時陳倉人掘地得物若羊非羊似猪非猪繆
公道中逢二童子曰此名蝮史記作媮在地中食死人腦

若以松柏穿其首則死故今種柏在墓上以防其害
也

辰州嵩溪有丹青樹枝葉直上籠雲下無枝條上有
五色葉圓如華蓋故號丹青樹俗謂之五采樹今在

辰陽縣

城陽縣城南有堯慶都墓廟前一池魚頭間有印文
謂之印頰魚若非祀者捕而不得

奇肱國其國人機巧能為飛車從風遠行湯時西風
吹奇肱人乘車東至豫州界後十年而風復至使遣
歸國去玉門四萬里

東海有牛魚其形如牛海人採捕剝其皮懸之潮水
至則尾起潮水落則尾伏

顧渚山有櫛汝反子樹其木如玉色渚人採之以為
杖

蛇一首兩身者名曰肥遺西華山中有也見則大旱

南海有水虫名曰筋蚌蛤之類也其小蟹大如榆莢筋開甲食則蟹亦出食筋合甲蟹亦還入為筋取食以終始生死不相離

西蜀石門山有樹名曰栲榔皮裏出屑如麵用作餅食之與麵相似因謂之栲榔麵焉

漢武帝元鼎元起招靈閣有一神女晉一玉釵與帝帝以賜趙婕妤至昭帝元鳳中宮人見此釵光瑩甚異共謀欲碎之明視釵匣唯見白燕直升天去後宮人常作玉釵因名玉燕釵

三國時昆明國貢魏漱金鳥鳥形如雀色常翱翔海上吐金屑如粟至冬此鳥即畏霜雪魏帝乃起溫室

以處之名曰辟寒臺故謂吐此金為辟寒金也

漢末關中大亂有發漢時宮人塚者宮人猶活既出平復如故魏郭后愛念之錄着宮人常置左右問漢時宮中事說之皆有次第郭后崩因哭泣過度遂死周昭王時塗修國獻青鳳丹鵠各一雌一雄吳郡魚城城下水中有石首魚至秋化為鳧鳧項中尚有石

南康郡有君山高秀重叠有類臺榭名曰女媧宮有獸名格似猩猩之形自知吉凶人無機愛之則可馴狎欲執害之則去不來

桂陽郡有銀井鑿之轉深漢有村人焦先於半道見

三老人徧身皓白云逐我太苦今往他所先知是怪以刀斫之三翁各以杖受刀忽不見視其斷杖是銀其井後遂不生銀也

儋耳郡明山有二石如人形云昔有兄弟二人向海捕魚因化為石因號兄弟石

貞山在毘陵郡梁時有村人韓文秀見一鹿產一女子在地遂收養之及長與凡女有異遂為女冠梁武帝為別立一觀號曰鹿娘後死入棺武帝致祭開棺視之但聞其香不見骸骨蓋尸解也遂葬棺於毘陵因號其葬處為貞山

江陰北有子英廟子英即野人也善入水捕魚得一赤鯉將著家池中養之後長徑一丈有角翅謂子英曰我迎汝身汝上我背遂昇於天為神仙晉時人璪珞似小蚌有一小蟹在腹中珞出求食故淮海之人呼為海奴

鶴

反故解刺

德宅

耳響則聽遠眼赤則眦遠大毛

落藮毛生其色如雪又云高脚踈節則多跛也若百六十年變止不食生物千六百年形定飲而不食與鳳為群

松有兩鬣三鬣七鬣者言如馬鬣形也言粒者非矣人間三十六洞天知名者十耳餘二十六天出九微志不行於世也

鯉魚滿三百六十鱗蛟龍輒率而飛去一年置一神
守之則不能去矣神則龜也

王僧辨嘗為荆南得橘一蒂三十子以獻梁元帝
吳太皇時朱休之家犬歌曰言我不能歌聽我歌梅
花今年故復可明年當柰何休遂殺其犬明年休家
人並死

哀牢夷西蜀國名也其先有婦人捕魚水中觸沉木
育生男子十人沈木為龍出水上九男驚走一兒不
去背龍因舐之後諸兒推為哀牢主

涿光山下蠶水多鰓鰈之魚如鵲而十翼捕之可以
禦火

吳桓王時會稽生五色瓜吳中有五色瓜歲充貢獻
東南有桃都山上有大樹名曰桃都相去枝三千里
上有天雞日初出照此木天雞即鳴天下雞皆隨之
鳴

合塗國去王都七萬里人善服鳥獸雞犬皆使能言
林屋洞為左神幽虛之天即天后真君之便闕中有
白芝紫泉皆此洞所出乃神仙之飲餌非常人所能
得之

日南郡出果下牛高三尺漢樂浪郡有果下馬並高
三尺

廬陵有木客鳥大如鵲千百為羣不與眾鳥相廁俗

云是古之木客花化作廬陵即今吉州也

後魏孝昌年中有洛子淵自云洛中人戍於彭城同營人樊元寶還子淵附書於洛上題云宅上靈臺書南延洛水既至洛忽逢一老翁曰吾兒書也引入門館甚盛呼坐命酒酒至赤色甚香美寶告退老翁出送但見高岸對水無復人家及還彭城子淵已失元寶與子淵同戍三年不知是水神也

彭城郡古徐國也昔徐君宮人生一大卵棄於野徐有犬名后倉銜歸温之卵開內有一兒有筋而無骨後為徐君號曰偃王為政而行仁義

相州栖霞谷昔有橋順二子於此得仙服飛龍一丸十年不饑故魏文詩曰西山有僊童不飲亦不食即此也

河間郡有聖姑祠姓郝字女君魏青龍二年四月十日與隣女樵采於滏深二水處忽有數婦人從水而出若今之青衣至女君前曰東海使聘為婦故遣相迎因敷茵於水上請女君於上坐青衣侍立側順流而下其家大小奔到岸側惟泣望而已女君怡然曰今幸得為水仙願勿憂憶語訖風起而沒於水鄉人因為立祠又置東海公像於聖姑側呼為姑夫

大翻山小翻山在媯州昔有王次仲年少入學而家遠常先到其師怪之謂其不歸使人候之寶又歸在

其家同學者常見仲捉一小木長三尺餘至則著屋
間欲共取之輒尋不見及年弱冠變蒼頡舊書為隸
書秦始皇遣使徵之不至始皇怒檻車囚之赴國路
次化為大鳥出車而飛去至西山乃落二翮一大一
小遂名其落處為大小翮山媯州即今幽薊之地
利州義成郡葭萌縣有玉女房蓋是一大石穴也昔
有玉女入此石穴前有竹數莖下有青石壇每因風
自掃此壇玉女每遇明月夜即下於壇上間步徘徊
復入此房

龍巢山下有丹水水中有丹魚欲捕其魚俟魚之浮
出水有赤光如火網取割其血塗足可涉水如履平

地

宋武帝大明五年廣郡獻白孔雀以為中瑞

秦惠王獻五美女於蜀王王遣五丁迎女乃見大地
入山穴中五丁曳地山崩五女上山皆化為石

一說少空山有貝樹與眾木有異一年三放花其多

花白色香美俗云漢世野人將子種於此

武都丈夫化為女子顏色美麗蓋山之精也蜀王娶
以為妻無幾物故遂葬於成都郭中以石鏡一枚長
二丈高五尺同葬之

衡州九疑山有舜廟郡守至官常致敬修祀則空中
如有弦歌之聲一說九疑山隔湘江跨蒼梧野連營

道縣界九山相似行者望之有疑因名曰九疑山
漢惠帝七年夏雷震南山林木皆自火燃至根其地
悉皆焦黃後其雨迅過人就其間得龍骨一具
晉世顏含嫂病須與蚺蛇膽療之則愈既不能得含
憂歎累日忽有一童子持青囊授含曰真蛇膽也童
子遂化為青鳥飛去
陽羨縣小吏吳龕家在溪南偶一日以檣頭船過水
溪內忽見一五色浮石龕遂取歸置於牀頭至夜化
為一女子至曙仍是石後復投於本溪
南海中有鮫人室水居如魚不廢機織其眼能泣則
出珠晉玄虛海賦云天琛水怪蛟人之室木

興安縣水邊有平石其上有石櫛石履各一具俗云
越王渡溪脫履墮櫛於此

荊州青溪秀壁諸山山洞往往有乳窟窟中多玉泉
交流中有白蝙蝠大如鷓按仙經云蝙蝠一名仙鼠
千載之後體白如銀棲即倒懸蓋飲乳而長生也

夜郎縣者西南遠夷國名也其先有女子浣沙忽三
節竹流入足間聞其中有號聲剖竹視之得一男歸
而養之及長有武畧自立為夜郎侯以竹為姓漢武
帝元鼎六年征西南夷改為牂柯郡夜郎侯迎降天
子賜以玉印綬後卒夷獠咸以竹王非血氣所生眾
為立廟今夜郎縣有竹王神是也

述異記卷下

述異記後序

夫述者著撰之名異者未聞之事然而簡牒紛
委百氏駢繁始業文者患於少書莫得以備見
務廣覽者失於精究鮮克以周記非夫博物君
子鴻儒碩彥家藏逸典日獵菁英則何以詮次
成書以資後學近閱梁世任昉述異記上下兩
卷嘉其纂集愛不能釋研玩之際竒粹間出辭
典而有據事怪而不俚綽有餘緒煥然非誣且
異夫成式酉陽之編但浮華而靡信子橫洞冥
之誌多誕忘以不經彼皆憑虛此盡撫實若造

鬻珍之市列金璧以交輝如觀作繪之坊絢丹
青而溢目誠可以助緣情之綺靡為擣翰之華
苑者矣惜其湮墜於世人所罕見因命工摹鏤
以永流布與我同志足以知彥升之博識云尔
肯

皇宋慶曆四禩中秋既望日序